

## **Pisortanit ikiorsiissutit pillugit Inatsisartut peqqussutaat nr. 15, 20. november 2006-imeersoq**

Suliassaqartitsiniarnermik inunnillu isumaginninnermik Kalaallit Nunaannut Inatsimmi nr. 580-imi, 29. november 1978-imeersumi § 2 naapertorlugu makku aalajangersarneqarput:

### **Kapitel 1**

Siunertaq inuttullu ataasiakkaatut akisussaaffik

§ 1. Peqqussummi matumani siunertarineqarpoq inunnt Kalaallit Nunaanniittunut allatut iliornikkut imminnut pilersorsinnaanngitsunut tamanut aningaasaqarnikkut isumannaallisaaviginninnissaq. Inuit imminnut ilaqtaminnillu pilersuisinnaanngitsut pilersuinnermut akiligassanullu aalajangersimasunut aningaasatigut ikiorserneqarnissaat peqqussutikkut aamma isumagineqassaaq.

§ 2. Inatsisartut peqqussutaat una naapertorlugu kialuunniit pisussaaffigaa imminut, katissimallugu aappariminik qitornaminillu 18-it inorlugit ukiulinnik pilersuinissani.

Imm. 2. Katissimallugu aapparmik pilersuisussaataaneq atuukkunnaartarpoq averusernikkut imaluunniit avinnikkut.

Imm. 3. Qitornamik pilersuisussaataaneq makku pissutigalugit atuukkunnaartarpoq

- 1) qitornaq nammineq katissimallugu aapparminik imaluunniit qitornaminik pilersuisussaataaleraangat, imaluunniit
- 2) paniusoq naartunerminut atatillugu pisortanit ikiorsiissutisiaqaleraangaat.

### **Kapitel 2**

Piomasagaatit nalinginnaasut

§ 3. Kinaluunniit Kalaallit Nunaanniittoq tassangaannartumik pisariaqavissumik pissaaleqilernermit pisortanit ikiorserneqartussaataavoq, tamatumani imminut ilaqtaminnillu pilersuisinnaanngikkuni.

§ 4. Pilersuinnermut akiligassanullu aalajangersimasunut kiisalu immikkut ittumik pisoqartillugu pisortanit ikiorsiissutinik pinsinaanermut piomasagaataapput qinnuteqartup Kalaallit Nunaanni najugaqartuunissaa inuillu allattorsimaffiannut nalunaarsimanissaa makkuninngalu naammassinnissimanissaa:

- 1) danskit nalagaaffianni innuttaanissamik,
- 2) danskit naalagaaffianni innuttaasumut katissimanissaa imaluunniit kingullermik katikkami danskit naalagaaffianni innuttaasumut katissimanissaa imaluunniit
- 3) nunanut allanut imaluunniit nunat tamalaat akornanni kattuffinnut isumaqatigiissutini, danskit nalagaaffianni innuttaanngitsut Kalaallit Nunaanniinnerminni ataavartumik pilersuinnermut akiligassanullu aalajangersimasunut ikiorsiissutisisinnaatitaanerannik imalinni, ilaanissaa.

Imm. 2. Inatsisartut peqqussutaat una naapertorlugu pisortanit ikiorsiissutinik tunniussisoqarsinnaavoq, pisariaqartitsineq ikiorsiissutit allat atorlugit pisinnaangikkaangat.

§ 5. Katinnikkut aappariinneq pillugu inatsit naapertorlugu imaluunniit meeqqat inatsisitigut illersugaanerat pillugu inatsit naapertorlugu pineqartoq allamut ikiorsiissutinik pisartagaqartumut akilersuuteqartussaataaappat, pisortat akilersuuteqartussaataasumut piunasaqaataasunut atatillugu piunasaqaateqartussaataalissapput ikiorsiissutigineqartartut nalingat tikillugit annertussuseqarsinnaasunik, tamatumani pilersuisussaataaneq § 2-mi maleruagassat naapertorlugit atorunnaareersimagaluarpalluunniit.

Imm. 2. Pisortat akilersuutit aalajangersarneqarnissaannik qaffanneqarnissaannilluunniit piunasaqaateqarsinnaasussangussapput.

§ 6. Pilersuinermit akiligassanullu aalajangersimasunut, takuuk § 13, kiisalu immikkut ittumik pisoqartillugu, takuuk § kapitel 6, pisortanit ikiorsiissutinik qinnuteqaat najugaqarfigalugu kommuunimi kommunalbestyrelsimut tunniunneqassaaq.

Imm. 2. Tassangaannartumik ikiorsiissuteqartoqarnissaannik qinnuteqaat, takuuk § 3, najugaqarfigalugu kommuunimi kommunalbestyrelsimut tunniunneqassaaq.

### **Kapitel 3**

Pisortanit ikiorsiissutinik pissarsinissamut piunasaqaatit

§ 7. Kommunalbestyrelsi tassangaannartumik pisariaqavissumik pissaaleqilernermit pisortanit ikiorsiissuteqarsinnaavoq qinnuteqartoq

1) inooqatigiinnermi pisimasumik, soorlu nappaammik, erninermik, suliffissaarunnermik inooqatigiikkunnaarnermilluunniit nalaataqarsimappat, aamma

2) imminut ilaqtutaminillu pilersuinermit akiligassanullu aalajangersimasunut pisariaqartitaminik pissarsisinnaangippat.

§ 8. Kommunalbestyrelsi pilersuinermit akiligassanullu aalajangersimasunut kiisalu ataasiartumik aningaasartuutitut pisortanit ikiorsiissuteqarsinnaavoq, qinnuteqartup § 7-imi piunasaqaatit naammassisimappagit kiisalu

1) suliffissaqanngikkuni suliffissaminillu naammaginartumik neqeroorfigineqarsimanngikkuni pimoorullugulu suliassarsiortuunngikkuni

2) sungiussiniarnermigut ajornartorsiornini, peqqinnginnini assigisaallu pissutigalugit sulisinnaangitsutut nalilerneqaruni imaluunniit

3) napparsimaguni imaluunniit erninermut atatillugu sulinngiffeqaruni taamalu sulisinnaanani.

Imm. 2. Naalackersuisut pilersuinermit akiligassanullu aalajangersimasunut kiisalu ataasiaannartumik aningaasartuutissanut pisortanit ikiorsiissutisisinnaanermut piunasaqaatit pillugit maleruagassanik aalajangersaasinnaapput, tassunga ilanngullugu sulilernissamut piareersimanissamut piunasaqaatinik qaqugukkullu qinnuteqartoq sulisinnaangitsutut nalilerneqartassanersoq.

### **Kapitel 4**

Innersuussineq aamma siunnersuineq

§ 9. Kommunalbestyrelsi pilersuinnermut akiligassanullu aalajangersimasunut pisortanit ikiorserneqarnissamik qinnuteqartoqaraangat innersuussisassaaq, qinnuteqartup pisortanit ikiorsiissutisisartussatut, suliffeqarnermi tapiissutisisartussatut allatulluunniit attuumassuteqartumik ikiorserneqarnissaa siunertaralugu.

§ 10. Kinaluunniit pilersuinnermut akiligassanullu aalajangersimasunut pisortanit ikiorsiissutinik qinnuteqartoq kommunalbestyrelsimit siunnersorneqarnissamik piumasaqarsinnaavoq, tassangaannartumik imaluunniit nalaakkumaakkaminik aningaasatigut ajornartorsiulissaguni sapinngisamik nammineerluni qaangiiniarnissaminut, ungasinnerusorlu isigalugu imminut ilaqtaminillu pilersuisinnaanissaminut.

Imm. 2. Siunnersuinnermi inuup atugai ataatsimut isigalugit isummerfigineqassapput pilersuisinnaanginnermut tunngavisoq kisiat isiginagu. Siunnersuineq saaffigisinnaasamut allamut attaveqalernissamut ikiuinerusinnaasinnaavoq, soorlu suliffissarsiuussisarfimmut, atornerluinermik katsorsaasarfimmut, peqqinnissaqarfimmut inissiatileqatigiinnulluunniit. Siunnersuineq inunntut ataasiakkaanut ataatsimoortunulluunniit ingerlanneqarsinnaavoq.

Imm. 3. Kisimiillutik pilersuisut ilaqtariillu meerartallit pisortanit ikiorsiissutisiaqalernerannut atatillugu sapinngisamik piaarnerpaamik siunnersuineq neqeroorutigineqartassaaq, tamannalu meeqqanik inuusuttunillu kommunalbestyrelsip ilitersuillunilu nakkutilliisussaatitaaneranut atasutut isigineqassaaq.

*Iliuusissanik pilersaarussiaq*

§ 11. Pilersuinnermut akiligassanullu aalajangersimasunut pisortanit ikiorsiissutisisartut imminut tunngasumik iliuusissatut pilersaarusiunneqarnissamut pisinnaatitaavoq kommunalbestyrelsi suleqatigalugu, takuujulli imm. 3.

Imm. 2. Iliuusissatut pilersaarussiaq siunnersuisimanermik aallaaveqassaaq aammalu makku pillugit ilitersuutinik imaqqassalluni:

- 1) Atornerluinermik katsorsarneqarneq.
- 2) Inuttut ineriartorneruneq.
- 3) Pisinnaangorsarneq.
- 4) Ilinniartitaaneq.
- 5) Sulilersitaaneq.
- 6) Suliffimmik attassisinnaaneq.
- 7) Piginnaangorsaaqqinneq
- 8) Ilinniarteqqinneqarneq.

Imm. 3. Inuit pilersuinnermut akiligassanullu aalajangersimasunut pisortanit ikiorsiissutinik piniarlutik saaffiginninnerminni annerpaamik ullunik 14-inik sivisussusilimmik ikiortinniartut imminerminnut tunngasumik iliuusissatut pilersaarusiunneqartassanngillat.

Imm. 4. Imminut tunngasumik iliuusissatut pilersaarut malinnaatinneqartassaaq pilersuinnermut akiligassanullu aalajangersimasunut pisortanit ikiorsiissutinik pisoq inatsisiliorneq alla naapertorlugu allatut ikiorneqalerpat, imminut tunngasumik iliuusissatut pilersaarusiortoqarnissaanik imaluunniit piginnaangorsaaqqinnermut pilersaarusiortoqarnissaanik piumasaqaateqartoqarluni. Inatsisiliorneq alla naapertorlugu taamatut pisoqassappat iminnut tunngasumik iliuusissatut pilersaarusiaareersoq imaluunniit piginnaangorsaaqqinnermut pilersaarusiaareersoq najoqqutassatut aallaaviusinnaavoq.

Imm.5. Pisortanit ikiorsiissutinik pisartagalik imminut tunngasumik iliuusissatut pilersaarusiortifigineqareerluni kommuunimut allamut nuuppat nuuttutullu nalunaarluni, kommuunip nuuffigisaata kommuunimit nuuffigineqartumit piniassavaa iliuusissatut pilersaarusiaq.

Imm. 6. Naalakkersuisut pineqartumut imminut tunngasumik iliuusissat suliarineqartarnerat pillugu maleruagassanik aalajangersaasinnaapput.

### *Malittarinnineq*

**§ 12.** Kommunalbestyrelsip iliuusissatut pilersaarut naliliiffigeqqissinnaavaa iluarsiiiffigalugulu, takuuk § 11, pisariaqartitsineq naapertorlugu, taamaaliornikkut qulakkeerniarlugu pilersuinnermut akiligassanullu aalajangersimasunut pisortanit ikiorsiissutisinissamut piumasaqaatit suli naammassineqarsinnaanersut.

Imm. 2. Annikillisamik § 13, imm. malillugu ikiorsiissutisiaqartitsisoqarpat, kommunalbestyrelsi qaammatip ataatsip qaangiunnerani naliliissaaq suli nammineq pisuussutigisamik pissaaleqisoqarnersoq.

## **Kapitel 5**

Pilersuinnermut akiligassanullu aalajangersimasunut pisortanit ikiorsiissutit tunniunneqartarnerat

### *Naatsorsorneqarnerat*

**§ 13.** Pilersuinnermut akiligassanullu aalajangersimasunut pisortanit ikiorsiissutisiat annertussusaat missiliuussinikkut aalajangerneqartarpoq qinnuteqartup maannamut inuuniarnikkut atugarisimasai, pilersuisutut pisussaaffii, katissimallugu aapparispap, nalunaarsorneqarsimasumik aapparispap imaluunniit naligisatut inooqatigisap isertitai, akiligassat aalajangersimasut najukkamilu pissutsit tunngavigalugit.

Imm. 2. Taamaallaat pisartagaqartumut taassumalu ilaqutaanut pisariaqavissutigut pilersornissaannut ikiorsiissutinik tunniussisoqarsinnaavoq aammalu ineqarnermut akiliummut, atuinermut aningaasartuutinut aningaasartuutinullu aalajangersimasunut allanut matussutissanik naleqquttunik.

Imm. 3. Aningaasartuutiviusut tunngavigalugit kiisalu najugaqatigiissinnaanermi iluaqutissat aallaavigalugit aningaasat aalajangersarneqassapput. Pilersuinnermut aningaasartuutinullu aalajangersimasunut pisortanit ikiorsiissutit annerpaamik SIK-p Naalakkersuisullu akornanni isumaqatigiissutit naapertorlugit ilinniarsimanngitsumut aningaasarsiarititat ikinnerpaaffiisa 65%-erisinnaavaat, taamaattorli imm. 4 takuuk.

Imm. 4. Pisuni immikkut ittuni SIK-p Naalakkersuisullu isumaqatigiissutaat naapertorlugu suliamik ilinniagaqarsimangitsut aningaasarsiaasa minnerpaat 65%-iat sinnerlugu ikiorsiissutinik tunniussisoqarsinnaavoq, tamanna pisariaqavissappat qinnuteqartup ilaqutaasalu pilersorneqarnissaannut akiligassanullu aalajangersimasunut, naleqquttumillu ineqarniarnermikkut atugaqaannarnissaannut.

Imm. 4. Pissaaleqilerneq nammineq pisuussutigisamik pinngorsimappat, pilersuinnermut akiligassanullu aalajangersimasunut pisortanit ikiorsiissutisiaasussat affaannaat kisimik tunniunneqarsinnaapput. Ikiorsiissutit aningaasannagornagit tunniunneqassapput.

Imm. 5. Nammineq pisuussutigisamik pissaaleqisoqarpat aallaavittut taamaallaat tunniunneqarsinnaapput pilersuinnermut akiligassanullu aalajangersimasunut pisortanit ikiorsiissutissat affaannai. Pilersuinnermut ikiorsiissutit aningaasannagornagit tunniunneqassapput. Kommunalbestyrelsip naliliinnermini immikkut isiginiartussaavai meerartaasinnaasut pisariaqartitaat isiginiarneqarsimanersut.

Imm. 6. Naligalugu inooqatigisaq peqqussummi matumani paasineqassaaq katissimanagu inooqatigisatut, pisortanit ikiorsiissutinik qinnuteqarnermi pisartagaqartup inooqatigisaa, tamannalu sioqqullugu sivikinnerpaamik ukiumi ataatsimi inuit nalunaarsorneqartarfianni najugaqatitut nalunaarsorneqarsimasussaq.

Imm. 7. Pilersuinnermut akiligassanullu aalajangersimasunut kiisalu immikkut ittumik pisortanit ikiorserneqarsinnaanermut Naalakkersuisut malittarisassanik aalajangersaasinnaapput.

**§ 14.** Qinnuteqartoq piffissap pilersuinnermut akiligassanullu aalajangersimasunut pisortanit ikiorsiissutisarfiusup iluani ulluni ataasiakkaani aningaasarsisarsimappat pilersuinnermut akiligassanullu aalajangersimasunut pisortanit ikiorsiissutisiat annikillineqassapput. Qinnuteqartumut suna pitsaanerutinneraa naapertorlugu pilersuinnermut akiligassanullu aalajangersimasunut pisortanit ikiorsiissutisiat annikillineqarsinnaapput

- 1) ullut aningaasarsiaqarfiusut ilanngaatigalugit, imaluunniit
- 2) aningaasat tunniunneqarsimasut ilanngaatigalugit.

**§ 15.** Pilersuinnermut akiligassanullu aalajangersimasunut pisortanit ikiorsiissutisiat pikkorissarnermi, katsorsartinnermi imaluunniit fagini ataasiakkaani atuartitsinnermut peqataanermi atuukkunnaarneq ajorput.

### *Tunniussineq*

**§ 16.** Pilersuinnermut akiligassanullu aalajangersimasunut piumasaqaatit § 8-imi allassimasut atuutilerneranniit pisortanit ikiorsiissutit tunniunneqartassapput ulloq saaffiginniffik aallarnerfigalugu.

**§ 17.** Pilersuinnermut akiligassanullu aalajangersimasunut pisortanit ikiorsiissutisiat aningaasannorlugit qinnuteqartumut tunniunneqarsinnaapput, aningaaserivimmut assigisaannullu ikineqarsinnaapput, taamaattoq takuuk imm. 2.

Imm. 2. Pilersuinnermut akiligassanullu aalajangersimasunut pisortanit ikiorsiissutisiat aningaasannagornagit tunniunneqarsinnaapput imaluunniit akiligassamik nassitsisumut toqqaannartumik tunniunneqarsinnaapput, pissutsit immikkut ittut tamanna pisariaqalersippassuk.

§ 18. Pilersuinnermut akiligassanullu aalajangersimasunut pisortanit ikiorsiissutisiat siumoortumik ullut 14-ikkaarlugit tunniunneqartassapput. Taamaattoq akiligassanut aalajangersimasunut pisortanik ikiorsiissutit tunniunneqarsinnaapput piffissami akiligassat akilerneqarfissaasa nalaani.

Imm. 2. Kommunalbestyrelsi qaqutigoorluinnartumik piffissamut sivikinnerusumut tunniussisinnaavoq, qinnuteqartup ikiorsiissutit nammineerluni aqussinnaanngikkai naliliisoqarpat. Kommuunip naliliinerminut atatillugu immikkut ilaqutariinni meeqqat pisariaqartitaasa iluaquserneqarnissaat pingaartissavaa.

Imm. 3. Pisortanit ikiorsiissutit tunniunneqartarnerat pillugu Naalakkersuisut malittarisassanik aalajangersaasinnaapput, tassunga ilanngullugu uppenarsaatinik tunniussinissamut malittarisassanik.

### *Pisuussutit*

§ 19. Kommunalbestyrelsi pilersuinnermut akiligassanullu aalajangersimasunut ikiorsiissutisiaqartitsisinnaanngilaq qinnuteqartoq imaluunniit katissimallugu aapparisaq imaluunniit naligalugu inooqatigisaq, takuuk §13, imm.6, pisuussuteqarpata aningaasatigut pisariaqartitanut matussutaasinnaasunik, taamaattoq takukkit imm. 2. aamma 3.

Imm. 2. Imm. 1.-imi aalajangersagaq atuutissanngilaq:

- 1) Pisuussutit ilaat, ineqarnikkut atukkat attatiinnarnissaannut imaluunniit ineqarniarnermi pisariaqavissut anguniarnerinut, imaluunniit qinnuteqartup ilaqutariillu inuussutissarsiornikkut ilinniartitaanikkullu periarfissaat eqqarsaatigalugit pigineqartariaqarpata.
- 2) Pisuussutilli ilaat annertunerunngitsut, taakku siunertanut aalajangersimasunut nassuiaasikkanullu pigiinnartariaqarpata pineqartup atugarisaanut najukkamilu ileqquliussaareersut malillugit naammaginartutut nalilerneqarpata.
- 3) Sulisinnaajunnaarneq pissutigalugu taartisiat, taakku tunniunneqartarpata inuup ajoqusersimanera una naapertorlugu
  - a) pinerlunnernik eqqugaasimasunut naalagaaffimmit taartisiaqarnissaq pillugu inatsisip Kalaallit Nunaanni atuutilernissaanut naalakkiut,
  - b) taarsiinissamut akisussaaffik pillugu inatsisip Kalaallit Nunaanni atuutilernissaanut naalakkiut,
  - c) sulinermi ajoqusernissamut sillimmateqarneq pillugu inatsisip Kalaallit Nunaanni atuutilernissanut naalakkiut.
- 4) Pisuussutit iluarsineqarsinnaanngitsumik aningaasarsiorerunngitsukkulli ajoqusernerup kingunerisaanik taartisiatut tunniunneqartut

Imm. 3. imm. 2-mi nr. 3 aamma 4-mi piumasagaataavoq taartisiat pilersuinnermut akiligassanullu aalajangersimasunut pisortanit ikiorsiissutinik pisartagaqartup pisuussutaanit allanit isertitaanillu immikkoortinneqassasut.

## **Kapitel 6**

Immikkut ittumik pisoqartillugu ikiuutit

Ataasiaannartumik aningaasartuutit

§ 20. Kommunalbestyrelsi ataasiartumik aningaasartuutitut naammaginartumik nassuiaaserneqarsimasunut ikiorsiissuteqarsinnaavoq, qinnuteqartup § 4-mi imm.1 aamma § 8-imi piumasagaataasut naammassisimappagit aammalu nammineerluni aningaasartuutini matuniassagunigit imminut ilaqtutamilu siunissami napatinniarnertut aalajangiisumik ajornartorsiuulersussaappat. Nalinginnaasumik aatsaat ikiorsiisoqarsinnaavoq aningaasartuutissaq siumoortumik naatsorsuutigineqarsinnaangitsumik pisariaqartinneqalersimappat. Taamaattoq ani-ngaasartuutitut siumoortumik naatsorsuutigineqareersinnaasunut kommunalbestyrelsi ataasiakkaatigit naliliinermigut qaqutigoortumik ikiorsiisinnaavoq, taamatut aningaasartuuteqarnissaq qinnuteqartup ilaqutariilluunniit inuuniarneranni pingaaruteqarluinnartuusimappat.

Imm. 2. Aatsaat immikkut illuinnartuni akiligassanut kinguaattoorutitut matussutissanik ikiorsiissutitut tunisisoqarsinnaavoq.

Imm. 3. Kommunalbestyrelsi aamma pisortanit ikiorsiisinnaavoq ilaqtutat qanigisat napparsimaneranni aamma/imaluunniit toqneranni ilisaanerannilu angalanissamut aningaasartuutitut. Kommunalbestyrelsimit piumasarineqarpat nakorsamit uppersaammik tunniussisoqassasoq, uppersaammik piniarnermut aningaasartuutitut kommunalbestyrelsip akilissavai.

#### *Nuunnermi ikiorsiissutit*

§ 21. Kommunalbestyrelsi nuunnermut qinnuteqartup imaluunniit ilaqutariit ineqarnikkut suliffissaqarnikkulluunniit atugaannut pitsaanerulersitsisumut ikiorsiissuteqarsinnaavoq, tamatumani qinnuteqartoq taassumaluunniit katissimallugu aappaa, akuerisaasumik aapparisaaligaluguluunniit inooqatigisaa, takuuk § 13, imm. 6, aningaasartuutitut akiliisinnaangippata kiisalu qinnuteqartup § 4-mi imm. 1-imi piumasagaatit naammassisimappagit.

Imm. 2. Kommuunimut allamut nuuttoqarpat, kommuunimit nuuffiusussamit kommunalbestyrelsimit akuersissummik pissarsisoqqaassaaq nuunnermut ikiorsiinnginnermi. Taama pisoqangippaat kommunalbestyrelsi nuunnermut ikiorsiissutitut tunisisoq kommuuniussaaq ukiuni marlunni akiliissusaaq.

§ 22. Qinnuteqartoq Kalaallit Nunaanni najugaqavissuunngitsoq angerlarniarluni angalanissamut aningaasartuutitut qinnuteqarpat qinnuteqartup kommuunimi najugaqarfigisaani kommunalbestyrelsi pisortanit ikiorsiissutitut tunniussisinnaavoq, qinnuteqartup aningaasartuutissat akilersinnaangippagit.

#### *Ilisinermi aningaasartuutit*

§ 23. Kommunalbestyrelsi ilisinermut aningaasartuutitut naleqquttunut matussutissanik pisortanit ikiorsiisinnaavoq, aningaasartuutitut pigisanit akilerneqarsinnaasimangippata toqusullu piumasagaatit § 4-mi imm. 1 naammassisimappagu.

#### *Napparsimasunut kaasarfimmiussutit*

§ 24. Pisortanit ikiorsiissutit napparsimasunut Nunatsinni Danmarkimillu napparsimmavinni uninngasunut kaasarfimmiiussissutitut tunniunneqarsinnaapput.

Imm. 2. Napparsimasut Nunatsinni Danmarkimilu uninngasut kaasarfimmiiussaannik pisortanik ikiorsiisoqarsinnaanerannut malittarisassanik Naalakkersuisut aalajangersaasinnaapput.

## Kapitel 7

Paasissutissanik pissarsiniartarnej paasissutissiinissamullu pisussaaneq

§ 25. Kommunalbestyrelsip qinnuteqartoq pisussaaffilersinnaavaa suliassaq pillugu paasissutissanik pissarsinissamut peqataaqqullugu. Kommunalbestyrelsip pineqartup akuersineratigut inuit allat tassanga ilisimannittut paasissutissanik piniarfigisinnaavai.

§ 26. Pisortanit ikiorsiissutitisisartoq pisussaavoq kommunalbestyrelsi ilisimatissallugu pissutsit atukkani allanngorpata, ikiorsiissutip annikillineqarneranik, atorunnaarsinneqarneranik utertittariaqalerneranilluunniit kinguneqartumik.

Imm. 2. Inatsisit allat ajornartinngippasuk kommunalbestyrelsi pisinnaavoq pisortanit allanit paasissutissanik naliliinariernermut atugassanik pissarsiniarnissaminut, matumani paasiniarneqarpat pisortanit ikiorsiissutitisisartoq ikiorsiissutinik pisartagaqarnissaminut pisinnaatitaajunnaarsimanersoq.

## Kapitel 8

Utertitsisarnej

§ 27. Kommunalbestyrelsip pisortanit ikiorsiissutinik tunniunneqartussaannigitsunik utertitsinissamik aalajangiisaaq, ikiorsiissutitisisartoq:

- 1) Paasissutissanik kommuunalbestyrelsimut tunniussisussaalluni ilisimaarereerlugu tunniussisimangippat, takuuk § 26.
- 2) Taamaaliortussaananil ilisimaarereeraluarlugu pisinnaatitaaffiginngisaminik peqqussut manna naapertorlugu ikiorsiissutitisisarsimappat.
- 3) Kingusinnerusukkut taarsiivigineqarpat, nalinginnaasunik akilersuutitissalerpat assigisaannilluunniit pissarsippat, piffissamut ikiorsiissutisiffigisimasaminut taassungalu assingusumik siunertalimmut.

§ 28. Aammattaaq kommunalbestyrelse pisortanit ikiorsiissutit utertinneqarnissaat pillugu aalajangiisinnaavoq:

- 1) Inuup aningaasaqarnikkut sulinikkulluunniit mianersuaalliorluni iliuuseqarnera pissutigalugu pineqartoq ikiorneqartariaqarpat.
- 2) Piffissami pisortanit ikiorsiissutitissinissamik qinnuteqarfiusumi takuneqarsinnaappat qinnuteqartoq piffissap sivikitsup ingerlanerani pisortanit ikiorsiissutinik utertitsisinnaasoq.

Imm. 2. Kommunalbestyrelsi aalajangerpat pisortanit ikiorsiissutinik imm.1-imi nr. 2 naapertorlugu utertinneqartussanik, tamanna ikiorsiissutitissisumut allakkatigut nalunaarutigineqassaaq kingusinnerpaamik pisortanit ikiorsiissutit tunniunneqarneranni. Kommunalbestyrelsi utertitsinissamik kinguartitsigallarnissamik akuersissuteqarsinnaavoq pisartagaqartoq aamma katissimallugu aapparisanilu imaluunniit naligalugu inooqatigisanilu pisortanit ikiorsiissutaannarnik



pisartagaqarpata.

Imm. 3. Kommunalbestyrelsi immikkut pisoqartillugu ikiorsiissutisalisalernermit ukiup ataatsip qaangiunnerani aalajangiisinnaavoq ikiorsiissutisiap utertitassanngorsimanera atorunnaassasoq.

## **Kapitel 9**

### Angerlarsimaffimmi ikiorteqartitsineq

§ 29. Kommunalbestyrelsip kommuunimi angerlarsimaffinni ikiorteqartitsinissaq aaqqissuutassaraa, taamaalilluni angerlarsimaffinni suliasatigut ikiorsiinissamut suliamut naleqquttumik piginnaassuseqarsorisanik sulisoqarluni ikiorsiisoqarsinnaaqqullugu.

Imm. 2. Utoqqarnut, sanngiillisimasunut innarluutilinnullu kiisalu napparsimasoqartillugu atugarisatigullu ajornartorsiuteqartoqartillugu angerlarsimaffinni ikiorteqartitsisoqarsinnaavoq.

Imm. 3. Naalakkersuisut angerlarsimaffinni ikiorteqarnermik aaqqissuussinermut malittarisassanik aalajangersaasinnaapput, tassunga ilanngullugu angerlarsimaffinni ikiorteqartitsinermi akiliuteqartarnissaq.

## **Kapitel 10**

### Naammagittaalliorsinnaaneq

§ 30. Kommunalbestyrelsimit Inatsisartut matumani peqqussutaat malillugu aalajangiinerit Isumaginninnermut Naammagittaalliteqartarfinnut naammagittaallitigineqarsinnaapput inunnik isumaginninnerup aqunneqarnera aaqqissuussaanelu pillugit Inatsisartut peqqussutaanni aalajangersakkat malillugit.

## **Kapitel 11**

### Aningaasalersorneqarnera

§ 31. Matumani peqqussut malillugu aningaasartuutit kommunalbestyrelsimit akilerneqartassapput.

## **Kapitel 12**

### Atuutilerfissaa

§ 32. Inatsisartut peqqussutaat 1. april 2007-imi atuutilerpoq.

Imm. 2. Tamatuma peqatigisaanik pisortanit ikiorsiissutit pillugit inatsisartut peqqussutaat nr.10, 1. november 1982-imeersoq atorunnaarsinneqarpoq.

Imm. 3. Maleruagassat pisortanit ikiorsiissutit pillugit inatsisartut peqqussutaat nr. 10, 1. november 1982-imeersoq tunngavigalugu aalajangersarneqarsimasut atuutiinnassapput, inatsisartut peqqussutaat manna imaluunniit inatsisartut peqqussutaat allat tunngavigalugit maleruagassanik aalajangersaanikkut taarserneqarnissaasaa imaluunniit atorunnaarsinneqarnissaasa tungaanut.

*Namminersornerullutik Oqartussat, ulloq 20. november 2006*

Hans Enoksen

/

Aleqa Hammond